



**USAID**  
HUSI POVU AMERIKANU



## **Droga Ameasa Seriu ba Timor-Leste?**

**Mahein Nia Lian Nú. 100, 14 Maiu 2015**



**Relatoriu Fundasaun Mahein Nia Lian ne'e suporta husi povu Amerikanu liu husi Ajéncia Estadus Unidus ba Dezenvolvimentu Internasional (USAID)**

**Vizaun husi autor sira ne'ebé expresa iha publikasaun relatoriu sira ne'e la representa vizaun husi Ajéncia Estadus Unidus ba Dezenvolvimentu Internasional (USAID)**

**Website: [www.fundasaunmahein.org](http://www.fundasaunmahein.org)**



## Kontiudu sira

<b>Introdusaun</b>	<b>3</b>
<b>Metodolojia</b>	<b>4</b>
<b>Númeru trafiku droga husi tinan 2011 to'o Marsu 2015</b>	<b>4</b>
<b>Autór droga sira ne'e mai husi ne'ebé?</b>	<b>5</b>
<b>Kazu konsumu droga no involve Timor-oan</b>	<b>7</b>
<b>Dadur ne'ebé ligasaun ho trafiku droga</b>	<b>8</b>
<b>Konkluzaan</b>	<b>10</b>
<b>Rekomendasaun</b>	<b>10</b>
<b>Bibliografia</b>	<b>11</b>



*“Droga inimigu boot ba Timor-Leste, ita fiar katak Timor-Leste laiha ema ida maka atu mai invade, maibe droga sai inimigu boot ida ba Timor-Leste, wainhira ita la prevene Timor sei rahun, no ita nia joven sira sai aat hotu, no nasaun ida ne’e atu ba ne’ebé”  
(Lere Anan Timur).<sup>1</sup>*

## Introdusaun

Tinan sira ikus ne’e relatoriu media nasional sira halo públiku hakfodak tebes kona-bá operasaun ne’ebé autoridade siguransa hala’o iha Kapital Dili. Operasaun ne’ebé rezulta kapturasaun ba trafiku droga ne’ebé buras maka’as iha Timor-Leste.<sup>2</sup> Trafiku droga involve grupu comunidade oin-oin tantu husi comunidade ekonomia baixu no hakait mos grupu comunidade ekonomia mediu no elite inklui familia polítiku balu, emprezariu, ukun na’in no autoridade siguransa balu.<sup>3</sup>

Dadus hatudu iha kazu droga lubun ne’ebé autoridade siguransa sira detekta no kaptura. Husi tinan 2011 to’o Marsu 2015 konsege rejista ema ho kazu droga hamutuk 40. Prosesa ona kazu hamutuk 22 ho desizaun Tribunal hodi submete iha prizaun preventiva, balu prizaun definitiva no sansaun. Kazu hirak ne’e involve ema estranjeiru no Timor-oan sira ho karakteristika konsumu, fa’an no distribui iha rai laran no rai viziñu. To’o konkluziun seluk katak Timor-Leste hanesan fatin *transit* ba droga.

Fundasaun Mahein (FM) nia monitorizasaun hare katak transportasaun droga liu husi aeroportu, tasi no rai ketan, husi autor rede krime organizadu sira. Nune’e mos forma sira ikus ne’e utiliza ajensia balu ne’ebé haruka no simu sasan husi no ba rai liur no mos kunsume iha rai laran. Iha ne’ebé involve maka’as ona sidadaun nasional sira.<sup>4</sup>

Husi kazu sira ne’ebé involve sidadaun nasional, dadur na’in ida ne’ebé halai sai husi Prizaun Bekora iha tinan 2013 to’o agora seidak hatene lolos sira nia paradeiru. Iha espekulasaun ka rumoris sira ne’ebé la’o iha sosiedade nia leet katak dadaun ne’e subar iha rai viziñu Indonezia. Maibe seidak iha seriedade husi autoridade siguransa Timor-Leste nian atu konfirma kona-bá rumoris ne’e.

<sup>1</sup> Droga Hanesan Inimigu Boot Ba Timor-Leste. Disponivel iha: <http://suara-timor-lorosae.com/droga-hanesan-inimigu-bot-tl/>. Asesu iha loran 24 fulan Abril tinan 2015.

<sup>2</sup> Droga La Iha Limitasaun, Hakiak Krime Brankamentu Kapital. Disponivel iha: <http://suara-timor-lorosae.com/droga-la-ih-limitasaun-hakiak-krime-brankamentu-kapital/>. Asesu iha loran 28 fulan Abril tinan 2015.

<sup>3</sup> Droga hahu Kait Familia Politikus iha Timor-Leste. Disponivel iha: <http://www.temposemanal.com/justisa/droga-hahu-kait-familia-politikus-tl/>. Asesu iha loran 22 fulan Abril tinan 2015.

<sup>4</sup> Timor-Leste Iha Perigu Boot Ba Transaksaun Droga no Kilat. Disponivel iha: <http://www.fundasaunmahein.org/2014/10/16/timor-leste-ih-perigu-boot-ba-transaksaun-droga-no-kilat/>. Asesu iha loran 30 fulan Abril tinan 2015.



## Metodolojia


Metodolojia ne'ebé adopta iha relatoriu ne'e rekolla husi informasaun sira husi media ne'ebé publika dahuluk ona. Nune'e mos rezultadu monitorizasaun FM nia ba kazu droga husi tinan 2011-2015. Monitorizasaun ba operasaun ne'ebé autoridade siguransa sira kaptura trafiku droga sira iha Timor-Leste, trafiku droga ne'ebé involve sidadaun nasional no estranjeiru sira, prosesu legal sira ne'ebé lori rezulta autór droga iha prizaun. Konklui relatoriu ida ne'e liu husi metodu ne'ebé Fundasaun Mahein (FM) adopta maka *Security Sector Discussion (SSD)*.<sup>5</sup>

Ojetivu husi relatoriu ida ne'e atu relata kona-bá número trafiku droga iha Timor-Leste. Husi número ne'ebé relata iha relatoriu ne'e nu'udar FM nia monitorizasaun iha tinan hirak liu ba. FM fiar katak número ida ne'e hanesan referensia ba autoridade siguransa atu deskobre liu tan. Iha ne'ebé relatoriu ne'e mos deskobre kona-bá autor trafiku droga nia forma operasaun, utilizasaun meius no dalan sira ne'ebé utiliza hodi tama sai iha rai laran no ba rai liur. Ikus liu ho sidadaun sira ne'ebé involve tantu husi rai laran no rai liur, inklui kazu hirak ne'ebé prosesu ona tuir lei ne'ebé vigora iha Timor-Leste.

## Número trafiku droga husi tinan 2011 to'o Marsu 2015

Hanesan introdus ona iha sesaun dahuluk husi relatoriu ida ne'e nian, rejista kazu sira husi tinan 2011 nian to'o inisiu tinan 2015. Nu'udar rezultadu husi monitorizasaun FM nian ba operasaun autoridade siguransa nian no públikasaun husi media nasional sira kona-bá trafiku droga. Número husi kazu ne'ebé FM rejista hare iha grafiku 1.

**Grafiku 1. Número trafiku droga iha Timor-Leste husi tinan 2011 to'o 2015**



**Fontes:** Resultadu Monitorizasaun FM nia husi tinan 2011-2015.

<sup>5</sup> Security Sector Discussion (SSD), hanesan termus ida ne'ebé FM uza hodi halo diskusaun, konsultasaun ne'ebé involve ema hotu-hotu, estudante sosiedade sivil, akademiku, no peritu sira ho hanoin kritiku ba isu ne'ebé kait ba dezvoltamentu setór siguransa iha Timor-Leste.



Rezultadu ne'e hatudu ba públiku kona-bá trafiku droga iha Timor-Leste, ne'ebé dadaun ne'e ema hotu preokupa katak droga nu'udar ameasa boot ba Timor-Leste liu-liu joventude sira. FM fiar katak kazu sira ne'ebé hatudu iha grafiku 1 la reprezenta kazu droga hotu-hotu iha Timor-Leste.

Grafiku ida ne'e hatudu kazu droga iha tinan 2012 sai númeru ne'ebé as liu ho kazu hamutuk 14. Signifika tinan 2012 nu'udar susesu ida husi operasaun autoridade siguransa, iha ne'ebé halo kapturasaun boot ba autór sira ne'ebé involve iha trafiku droga. Kompara ho tinan 2011 ho kazu 2. Tinan 2013 aumenta tan kazu 8 ne'ebé hetan kapturasaun husi autoridade siguransa sira. Ekuantu tinan 2014 kaptura trafiku droga 6, numeru ida ne'ebé hatudu menus maibe ema ne'ebé involve iha droga aumenta. Nune'e mos iha tinan 2015 nia laran to'o fulan Marsu kazu droga aumenta tan no rejista kazu 10.


Númeru ne'ebé rejista FM identifika ho forma konsumu iha rai laran involve Timor-oan balu no distribui iha rai laran no ba rai liur hakat rai ketan via terestre, tasi no aero. FM nia deskonfia sei iha kazu barak-tan husi kazu sira ne'ebé rejista. Portantu FM nia monitorizasaun iha lakunas barak ne'ebé autor trafiku droga sira aproveita hodi hakat rai ketan via terestre no maritima. Iha kazu seluk odamatan aero portu sei menus ekipamentu hodi detekta. Nune'e movimentu trafiku droga nian tama-sai ho livre no utiliza Timor-Leste hanesan fatin *transit*.

#### **Autór droga sira ne'e mai husi ne'ebé?**

Husi ne'ebé rejista trafiku droga mobiliza husi membru sindikatu internasional hodi transfere ba rede organizadu sira ne'ebé estabesidu iha nasaun sira ne'ebé sai ona potencia ba merkadu droga. Enkuantu Timor-Leste hanesan fatin *transit* ba rai sira seluk. Kazu ne'ebé deskobre rede krime organizadu mobiliza husi Afrika atraves Singapura mai iha Timor-Leste hafoin transfere ka distribui ba Indonezia, nune'e mos konsumu iha rai laran. Nune'e egrafiku tuir mai sei hatudu ema husi Nasaun oin-oin ne'ebé kaptura husi autoridade siguransa Timor-Leste nian. (Hare iha grafiku 2).

Grafiku tuir mai ne'e sei hatudu kona-bá ema sidadaun nasional no estranjeiru sira ne'ebé durante ne'e involve iha kazu droga. Kompostu husi sidadaun nasional no ema estranjeiru sira hanesa Indonezia, Singapura, Australia, Amerika, Afrika do Sul no Xina ho nia númeru maka hanesan tuir mai ne'e.

**Grafiku 2. Sidadaun nasional no estranjeiru sira ne'ebé involve trafiku droga**



**Fontes:** Resultadu Monitorizasaun FM nia husi tinan 2011-2015.

Grafiku iha leten ne'e hatudu Timor oan ho kazu 20. Tuir mai sidadaun Indonezia ho kazu 14, Afrika do Sul 2, Australia 1, Amerika 1, Singapura 1 no Cina 1. Númeru ne'e indika Timor-oan involve droga ho númeru ne'ebé a'as kompara ho sidadaun estranjeiru sira. Enkuantu evidensia balu husi operasaun autoridade siguransa nian, aliende droga hetan mos makina ne'ebé durante ne'e produs droga, iha ne'ebé transfere husi rai seluk hodi halo prosesamentu ikus iha Timor-Leste hodi distribui.<sup>6</sup>

Sorin seluk grafiku iha leten mos hatudu sidadaun Indonezia involve droga ho numeru ne'ebé aas hafoin Timor-Leste. Indonezia hanesan rai vizinu ne'ebé besik liu ho Timor-Leste iha ligasaun direta fronteira rai ketan no tasi ne'ebé nakloke. Biban ba autór droga sira bele utiliza frazilidade sira iha kontrolu fronteiras hodi tama, sai no sirkula iha rai laran.

FM nia analiza ida ne'e nu'udar frakeza fundamental ida husi atuasaun autor seguransa nian. Autor sira husi krime organizadu hare katak situasaun siguransa Timor-Leste sei frajil ho limitasaun hirak ne'ebé husi instituisaun siguransa nian. Portantu odamatan tama-sai nian hanesan aero portu, portu no fronteira terestre nian menus rekursu ekipamentu atu detekta no menus rekursu ema sira iha kuiñesementu ba forma krime organizadu nian.<sup>7</sup> Dalan úniku seluk area maritima Timor-Leste nian ne'ebé luan, menus kontrola husi autor siguransa, rede krime organizadu sira dalabalu aproveita hodi halo transaksaun ilegal.

<sup>6</sup> Timor-Leste Iha Perigu Boot Ba Transaksaun Droga no Kilat. Disponivel iha: <http://www.fundasaunmahein.org/2014/10/16/timor-lesteha-perigu-boot-ba-transaksaun-droga-no-kilat/>. Asesu iha laron 30 fulan Abril tinan 2015.

<sup>7</sup> Menus Rekursu Humanu, TL Susar Deteta Droga Iha Rai Laran. Disponivel Iha: <http://suara-timor-lorosae.com/menus-rekursu-humanu-tl-susar-detekta-droga-iharai-laran/>. Asesu iha laron 20 fulan Abril tinan 2015.


### Kazu konsumu droga no involve Timor-oan

Estatistika kazu ba Timor oan sira ne'ebé konsumu droga. Husi monitorizasaun FM rekolla kazu drogas ne'ebé hetan kapturasaun husi autoridade siguransa sira. Ho maneira sira konsumu nia hanesan sona ba nia-an rasik no sona tutan ba ema seluk inklui maneira seluk maka hemu, horon, fuma no mos balun tau ba nanal okos ho meius oin-oin tan.

Nune'e iha grafiku tuir mai ne'e sei hatudu kazu konsumu droga iha Timor-Leste ne'ebé involve Timor oan sira. Grafiku ne'e sei hatudu komparasaun ida kona-bá Timor oan feto no mane sira ne'ebé involve konsumu droga. Rezultadu ne'e hatudu mane hamutuk 57 no feto 7. (Hare iha Grafiku 4).

Rezultadu iha peskiza ida ne'e nu'udar monitorizasaun FM nia no la reprezenta kazu hotu-hotu kona-bá konsumu droga nia iha Timor-Leste. FM hanoin kazu sira ne'ebé rejista ne'e nu'udar kazu ne'ebé detekta ona husi autoridade siguransa sira. Enkuantu kazu barak FM deskonfia kontinua iha deskontrolsaun nia laran.

**Grafiku 3. Númeru ema konsumu droga iha Timor-Leste**



**Fontes:** Resultadu Monitorizasaun FM ba kazu konsumu droga iha Timor-Leste, tinan 2015.

Hakle'an husi númeru iha leten no rezultadu monitorizasaun FM nian katak ema Timor oan hamutuk 64 maka deteta konsumu droga. Kompostu husi mane 57 no feto nain 7, ne'ebé durante identifika konsumu droga.<sup>8</sup> Maske estatistika kazu ne'e hatudu ho kuantidade sei kiik. Buat ida ne'ebé presiza hatene maka droga la'os deit involve ema sira ne'ebé hetan ona kapturasaun husi autoridade siguransa ho kazu sira ne'ebé hatudu ona. Droga involve maka'as joven Timor oan ne'ebé ho idade produtivu. Relatoriu UNFPA kona-bá "Drug Use in Timor-

<sup>8</sup> Rezultadu monitorizasaun FM nian ba kazu konsumu droga liu husi media monitoring no relatoriu sira husi sociedade sivil sira nian tinan 2011 to'o tinan 2015.



*Leste – an Assessment*”, iha rezultadu peskiza ne’e relata katak ema ne’ebé involve konsumu droga ho maioria idade 18-23.<sup>9</sup>

Droga ho tipu oin-oin ne’ebé bele kauza hodi hamenus ka halakon sentimentu tauk no bele muda ema nia mentalidade.<sup>10</sup> Droga mos halo ema dependensia bainhira aimoruk ne’e konsumu bei-beik. Portantu ho maneira sira konsumu nia ne’ebé iha tendensia ba konfliktu maka hemu kahur ho tua no fuma kahur ho tabaku.

Iha ona akontesimentu balu ne’ebé notifika katak grupu ida ne’ebé tenta halo ataka hasoru diplomata Amerikanu ida besik portaun entrada Embaixada Amerika nian iha *Praia dos Coqueiros* - Dili, ne’ebé deskonfia autór konsume droga.<sup>11</sup> Aimoruk sira ne’ebé autór sira ne’e konsumu mai husi rai liu nia ho ligasaun Bandar droga balu husi Indonezia nia. Relatoriu seluk husi ONG BELUN deskobre katak Timor-Leste iha mos aimoruk droga ho tipu oin-oin ne’ebé iha dadaun ne’e deskontrola hela. Exemplu, aifunan korneta babain uza barak husi foin sa’e sira iha tempu ka eventu ho serimonia sira, hemu hamutuk tua.<sup>12</sup> FM nia tauk iha potencia maka’as ba labraik kiik sira ne’ebé gosta ransu no fuma dalaruma mos involve no koko ona.

Relatoriu UNFPA kona-bá “*Drug Use in Timor-Leste – an Assessment*”, tinan 2012 nian, droga ho tipu haat maka ema uza ona iha Kapital Dili. Tipu droga hirak ne’e hanesan; *methamphetamine*, *ecstasy (MDMA)*, *marijuana* no *heroin*.<sup>13</sup> Droga hirak ne’e lori maioria husi ema estranjeiru sira no konsumu iha Bar balu, diskoteka no Hotel balu iha Timor-Leste.

### **Dadur ne’ebé ligasaun ho trafiku droga**

Husi kazu sira ne’ebé autoridade siguransa kaptura involve iha trafiku droga ho karakterista konsumu no fa’an ka distribui. FM nia monitorizasaun hare katak durante iha ona kazu droga lubun balu prosesa ona ba Ministériu Públiku no hetan ona desizaun husi Tribunal nune’e suspeitu balu tama ona prizaun preventiva, definitiva no sansaun.<sup>14</sup>

<sup>9</sup> Relatoriu UNFPA kona-bá “*Drug Use in Timor-Leste – an Assessment*”. Disponivel iha <http://countryoffice.unfpa.org/timor-leste/?reports=5408>. Asesu iha loraon 14 fulan Abril tinan 2015.

<sup>10</sup> Definisauon Droga tur Lei Indonezia nian “*Undang - Undang Republik Indonesia Nomor 22 Tahun 1997 Tentang Narkotika*”. <http://www.dinkesjatengprov.go.id/download/uu/Peraturan-Farmasi/UU-narkotika.pdf>. Asesu iha loraon 14 fulan Abril tinan 2015.

<sup>11</sup> Fundasaun Mahein. (2013). Forma Foun Operasaun Krime Organizado iha Timor-Leste. Mahein Nia Lian Nú. 60. Disponivel iha: [http://www.fundasaunmahein.org/wp-content/uploads/2013/10/MNL\\_Nu.60\\_03102013\\_Krime-Organizadupdf.pdf](http://www.fundasaunmahein.org/wp-content/uploads/2013/10/MNL_Nu.60_03102013_Krime-Organizadupdf.pdf). Asesu iha loraon 20 fulan Abril tinan 2015.

<sup>12</sup> Belun. (2012). Relatoriu Política: Uza Alkohol Liga ba Konfliktu. Disponivel iha: <http://belun.tl/relatoriu-politika-uza-alkohol-liga-ba-konfliktu/>. Asesu iha loraon 30 fulan Abril tinan 2015.


<sup>13</sup> Relatoriu UNFPA kona-bá “*Drug Use in Timor-Leste – an Assessment*”. Disponivel iha <http://countryoffice.unfpa.org/timor-leste/?reports=5408>. Asesu, 14 Abril 2015.

<sup>14</sup> Komandante PNTL Serbisu Investigasaun Kriminal (SIK) informa katak Tinan 5 nian loraon PNTL rejista ona kazu lubun, balu prosesa ona ba Ministériu Públiku (MP), suspeitu balu tama ona prizaun preventivu, definitivu no sansaun. (Le’e Jornal Independente 26 Fevereiro 2015)



Diretúr Prizional Becora João Domingos, hato'o ba FM katak durante ne'e prizaun konserva ona dadur ba kazu droga hamutuk ema 22 iha prizaun Timor-Leste.<sup>15</sup> Dadur hirak ne'ebé involve husi sidadun nasional no ema estranjeiru. Kompostu husi dadur na'in 16 maka sei kumpri hela iha prizaun Becora no Gleno no ida seluk halai sai husi Prizaun Becora iha tinan 2013. Na'in 5 hetan ona liberdade kondisional. Grafiku tuir mai hatudu kona-bá dadur sira ne'ebé ligasaun ho trafiku droga iha Timor-Leste.

**Grafiku 4. Dadur sira ne'ebé ligasaun ho trafiku droga iha Timor-Leste.**



**Fontes:** Diretúr Nasional Serbisu Prizional (DNSP), tinan 2015

Grafika iha leten hatudu kona-bá dadur sira ligasaun ho trafiku droga ne'ebé dadaun ne'e kumpri hela iha prizaun Timor-Leste nian. Grafika hatudu sidadaun Indonezia hamutuk ema na'in 10 no sidadun seluk Singapura 1 no Xina 1 dadaun ne'e sei kumpri hela iha prizaun Becora no Gleno. Liberdade kondisional Indonezia na'in 2, Amerika 1. Sidadaun hirak ne'e kaptura husi autroidade siguransa tanba involve transaksaun droga iha Timor-Leste.

Nune'e mos involvimentu Timor-oan sira iha kazu droga nian. Rezultadu iha estatistika ne'e hatudu Timor-oan na'in 4 dadaun ne'e sei kumpri hela iha prizaun no na'in 2 seluk hetan ona liberdade kondisional depois kumpri iha prizaun tuir lei ne'ebé tribunal aplika. Ironiu liu dadur Timor oan ida ne'ebé halai sai husi prizaun Becora iha tinan 2013 to'o agora seidauk hatene nia paradeiru.<sup>16</sup>

<sup>15</sup> Domingos, João. Diretúr Prizaun Becora. (2015). Entrevista Pesoal.

<sup>16</sup> Espekulasaun Informasaun no Desizaun Lori Fila Dadur Juga Gama no Alcino M. Pereira. Disponivel iha: <http://www.fundasaunmahein.org/2014/08/18/espekulasaun-informasaun-no-desizaun-lori-fila-dadur-juga-gama-no-alcino-m-pereira/>. Asesu iha loron 20 fulan Abril tinan 2015.



## Konkluzan

Timor-Leste seidak iha lei espesifiku no politika ida klaru kona-bá luta kontra trafiku droga nian. Preokupasaun sira husi públiku ho konkluzan ida katak Timor-Leste iha perigu boot ba droga. Husi númeru ne'ebé relata droga naksulin mai husi rai liur no utiliza Timor-Leste hanesan fatin *transit* ba rai viziñu balu. Relata mos trafiku droga involve Timor-oan ho númeru ne'ebé boot husi kazu sira ne'ebé detekta.

Iha potencia boot ba trafiku droga sira kontinua infiltra tanba frajilidade sira ne'ebé Timor-Leste iha. Intermus rekursu ema no fasilidade hodi kontrola no detekta movimentu droga sai-tama iha Timor-Leste iha odamatan sira hanesan aero portu, portu no fronteira terrestre nian. Relatoriu ne'e mos deskobre katak kapturasaun husi autoridade siguransa hasoru trafiku droga, kaptura mos makina produs droga nian.

FM nia alerta ba sosiedade tomak katak Timor-oan barak maka estuda hela iha universidade sira Indonezia nian ho númeru ne'ebé deskontroladu. Iha ne'ebé dala balu sira involve iha krime tantu oho malu no atividade kontra-bandu sira hanesan fa'an motor ilegal no hatama mai iha Timor-Leste liu husi dalan ilegal. FM nia preokupasaun ba estudante sira bele hetan influencia no rekruta husi rede krime organizadu hodi involve iha trafiku droga. FM nia tauk, Indonezia ho nia lei forte hodi aplika pena de-morte ba trafiku droga. Hanesan públika husi media Internasional sira katak to'o fulan Abril tinan 2015, ema na'in sanolu resin ona maka kumpri ona pena de-morte. Maioria husi sidadaun estranjeiru no Indonezia rasik.

## Rekomendasaun

1. Rekomenda ba Governu no Parlamentu Nasional aselera diskusaun ba esbosu lei kona-bá trafiku droga no konsumu ilisitiu droga nian.
2. Rekomenda ba Governu haforsa kontrolu integradu iha rai ketan Timor-Leste nian, aero portu no portu ho rekursu ne'ebé naton hodi detekta forma krime trafiku droga nian ba movimentu sira ne'ebé tama-sai iha rai laran.
3. Rekomenda ba Governu haforsa serbisu informasaun siguransa nian no investigasaun ba trafiku droga nian hodi deskobre forma hirak ne'ebé kompleksu no utilizaun teknolojia modern.
4. Rekomenda ba Governu presiza kria komisaun nasional ida ba prevensaun no sai hanesan kampañia nasional ida hodi konsientiza komidade sira kona-bá risku husi droga inklui sentru rehabilitasaun ba ema ne'ebé konsumu ona droga.



## Bibliografia

- Belun. (2012). Relatoriu Polítika: Uza Alkohol Liga ba Konflitu. Disponivel iha: <http://belun.tl/relatoriu-politika-uza-alkohol-liga-ba-konflitu/>. Asesu iha loron 30 fulan Abril tinan 2015.
- Definisaun Droga tuir Lei Indonezia nian “*Undang - Undang Republik Indonesia Nomor 22 Tahun 1997 Tentang Narkotika*”. Disponivel iha: <http://www.dinkesjatengprov.go.id/download/uu/Peraturan-Farmasi/UU-narkotika.pdf>. Asesu iha loron 14 fulan Abril tinan 2015.
- Domingos, João. Diretúr Prizaun Becora. (2015). Entrevista Pesoal.
- Droga Hanesan Inimigu Boot Ba Timor-Leste. Disponivel iha: <http://suara-timor-lorosae.com/droga-hanesan-inimigu-bot-tl/>. Asesu iha loron 24 fulan Abril tinan 2015.
- Droga La Iha Limitasaun, Hakiak Krime Brankamentu Kapital. Disponivel iha: <http://suara-timor-lorosae.com/droga-la-ih-limitasaun-hakiak-krime-brankamentu-kapital/>. Asesu iha loron 28 fulan Abril tinan 2015.
- Droga hahu Kait Familia Politikus iha Timor-Leste. Disponivel iha: <http://www.temposemanal.com/justisa/droga-hahu-kait-familia-politikus-tl>. Asesu iha loron 22 fulan Abril tinan 2015.
- Espekulasaun Informasaun no Desizaun Lori Fila Dadur Juga Gama no Alcino M. Pereira. Disponivel iha: <http://www.fundasaunmahein.org/2014/08/18/espekulasaun-informasaun-no-desizaun-lori-fila-dadur-juga-gama-no-alcino-m-pereira/>. Asesu iha loron 20 fulan Abril tinan 2015.
- Fundasaun Mahein. (2013). Forma Foun Operasaun Krime Organizadu iha Timor-Leste. Mahein Nia Lian Nú. 60. Disponivel iha: [http://www.fundasaunmahein.org/wp-content/uploads/2013/10/MNL\\_Nu.60\\_03102013\\_Krime-Organizadupdf.pdf](http://www.fundasaunmahein.org/wp-content/uploads/2013/10/MNL_Nu.60_03102013_Krime-Organizadupdf.pdf). Asesu iha loron 20 fulan Abril tinan 2015.
- Komandante PNTL Serbisu Investigasaun Kriminal (SIK) informa katak Tinan 5 nian laran PNTL rejista ona kazu lubun, balu prosesa ona ba Ministériu Públiku (MP), suspeitu balu tama ona prizaun preventivu, definitivu no sansaun. (Le'e Jornal Independente 26 Feveireiru 2015).
- Menus Rekursu Humanu, TL Susar Deteta Droga Iha Rai Laran. Disponivel Iha: <http://suara-timor-lorosae.com/menus-rekursu-humanu-tl-susar-detekta-droga-ih-rai-laran/>. Asesu iha loron 20 fulan Abril tinan 2015.
- Relatoriu UNFPA kona-bá “Drug Use in Timor-Leste – an Assessment”. Disponivel iha <http://countryoffice.unfpa.org/timor-leste/?reports=5408>. Asesu, 14 Abril 2015.
- Timor-Leste Iha Perigu Boot Ba Transaksaun Droga no Kilat. Disponivel iha: <http://www.fundasaunmahein.org/2014/10/16/timor-leste-ih-perigu-boot-ba-transaksaun-droga-no-kilat/>. Asesu iha loron 30 fulan Abril tinan 2015.